

Lueggaeuhung——

Lueg Dah Ceiq Hung Dieg Guengjsae

大藤峡——广西最大河道峡谷

□ Siz Caizyij / 石才以

Mbawdoz Dadwngzgyaz Suijli Suhniuj Gunghcwngz veh ok yiengh gyaecunde daengzcog.

“Lueggaeuhung” dwg mingz Cuengh, mingz Gun heuhguh “Dadwngzgyaz”.

Lueggaeuhung dwg duenh baihlaj Dahgenzgyangh, youq yienh Vujsenh caeuq singz Gveibingz giz doxgap lueg bya rangh dah haenx, dwg duenh dah lueg bya ceiq hung、ceiq raez、ceiq okmingz dieg Guengjsae. Gizneix miz ndoi hung、bya daengj、raemx laeg、dan yiemj、gingj lengj daengj daegdiemj, vunzlai haenh dwg “Sanhgyaz” Guengjsae (“Sanhgyaz” dwg duenh Dah-cangzgyangh okmingz ndeu).

Lueggaeuhung bakhaej daij Danlaegmax suenqguh, gizneix cingq dwg aen baksok geq yienh Vujsenh—— Soklaegmax. Bakok gizhaenx heuhguh dan Nujdanh, gizneix caeuq singz Gveibingz gek mbouj gyaec lo, Lueggaeuhung gwnzlaj raez 41 cienmaex.

Ciuhgeq cienz gangj, Lueggaeuhung yienzbonj miz diuz gaeu hung ndeu vang gvaq song mbiengj dah, ngoenz caem haemh fouz, vunz yamq gwnz gaeu cix byaij ndaej gvaq dah, ndigah vunzlai heuh duenh dah neix guh “Lueggaeuhung”.

Ndwn youq gwnz Danlaegmax bakhaej Lueggaeuhung, swmh raemx

muengh bae, hamq baihbak dwg Byagaeuhung, hamq baihnanz dwg Byalaegmax, song bya doxdaengj, yiengh lumj bakdou hung. Caiq muengh gizgyae bae, rangh dah Lueggaeuhung song mbiengj bya-ndoi youh na youh sang, hamq baihbak miz bya’gyoengq Dayauz-san, hamq baihnanz miz bya-gyoengq Lenzvashan. Gizneix, “Bya’gyoengq gab diuz dah, raemx gvaq geh ndonj bae.”

Lueggaeuhung, lumj diuz mae gimhenj ndeu, dawz song gaiq diegbingz nangqrangh hwnjdaej, baihgwnz nangqrangh diegbingz Vujsenh, baihlaj nangqrangh diegbingz Gveibingz. Diuz mae gimhenj neix hix dawz haujlai aen singz hung nangqrangh hwnjdaej, baihgwnz nangqrangh Liujcouh、Namzningz daengj, baihlaj nangqrangh Vuzcouh、Gvangjcouh、Yangghangj、Aumwnz daengj. Duenh dah lumj gim baenzneix dijbauj neix, hwnzngoenz ruzhang ruzfaex youzledled, huq gai huq cawx yinh bae yinh dauq, gwnz dah nyaengq raixcaix.

Lueggaeuhung, gingjsaek lengj-lili, bya heu faex loeg, mbanj Cuengh、mbanj Gun、mbanj Yauzcuz sanq youq bangx ndoi

dinbya. Gaxgonq, bya’ndoi saek-nyannyan, vunzmbanj hojsensen. Seizneix, ndwenngoenz ndei gvaq lo, mbanj doeng lohsuijniz, ranz guhbaenz laeuz moq. Loh moq heux bya lumj lungz foux, ranz gaeuq sauq seuq hawj hek youz.

Mingzcauz boux okmingz diliyozgyah Ciz Yahgwz, naengh ruz youz gvaq Lueggaeuhung, haenh gizneix ndoi na、bya daengj、raemx laeg、dan yiemj、gingj lengj, de yungh Sawgun yienghneix sij naeuz “两岸山势高耸，独冠诸峰，时有山峰悬峙”。Aenvih Lueggaeuhung bya sang lueg yiemj, diegdeih youqgaenj, soqlaiz cungj dwg gizdieg bouxbing cengciemq. Gaxgonq, Lueggaeuhung deng gaij heuhguh “Lueggaeugoenq” gvaq, youh deng gaij heuhguh “Luegcungjdoeng” gvaq. 1974 nienz lingjsiu hungmbwk raeuz Mauz Cwzdungh, caenbit vih Lueggaeuhung sij Sawgun “大藤峡” sam aen cih.

Seizneix, Lueggaeuhung cingq haiguh Dadwngzgyaz Suijli Suhniuj Gunghcwngz, gvaqlaeng Lueggaeuhung couh baenz aen daemz hung ndeu lo, daengz seizhaenx, Lueggaeuhung youh bienqbaenz lingh cungj gingjsaek moq lo.



▲ Goengqbya rangh dah daengjdwt sangvid.



▲ Rindat caengz daeb caengz lwnh gij goj diuzdah.



▲ Ndaw dah ruz bae ruz dauq.



▲ “Lueggaeuhung” sam cih Sawgun youz Mauz Cwzdungh sij haenx gaek youq gwnz dat sang.



▲ Raemxdah dongj gvaq rindat lae baenaj.



▲ Raemxdah caemh miz seiz cingz laeg.

► Bya heu raemx saw yinx vunz youz.